

Na osnovu člana 23. Statuta Brčko Distrikta BiH ("Službeni glasnik Brčko Distrikta BiH" broj: 1/00) Skupština Brčko Distrikta na 54. sjednici održanoj 13. decembra 2002.godine, usvaja

Z A K O N

O ZEMLJORADNIČKIM ZADRUGAMA BRČKO DISTRIKTA BiH

I – OSNOVNE ODREDBE

Član 1.

Zemljoradnička zadruga (u daljem tekstu: Zadruga) je dobrovoljna organizacija zadrugara u kojoj svaki član učestvuje neposredno i ravnopravno, i u kojoj zajedničkim poslovanjem, po načelu uzajamne pomoći ostvaruje i štiti svoj ekonomski i drugi interes, i stiče dobit saglasno zakonu i statutu.

Član 2.

Zadruga stiče svojstvo pravnog lica upisom u sudski registar.
Zadruga obavlja jednu ili više djelatnosti za koje je registrovana i za koje ispunjava uslove.

Član 3.

Zadruga može početi obavljanje djelatnosti za koju je registrovana na osnovu rješenja nadležnih organa o ispunjavanju tehničkih i drugih uslova propisanih za obavljanje te djelatnosti.

Član 4.

Djelatnost zadruge se određuje u skladu sa Zakonom o standardnoj klasifikaciji djelatnosti Brčko Distrikta BiH.

Član 5.

Zadruga može zaključivati ugovore i obavljati druge poslove prometa roba i usluga u okviru djelatnosti za koje je registrovana.

Član 6.

Firma je naziv pod kojim zadruga posluje i može sadržavati grafičke ili stilizovane oznake.

Zadruga može imati i skraćenu oznaku firme.

Član 7.

Sjedište zadruge je mjesto u kojem se obavlja djelatnost zadruge.

Ako se djelatnost obavlja u više mjesta, sjedište zadruge je mjesto utvrđeno ugovorom o osnivanju zadruge ili statutom zadruge.

Član 8.

Zadruga može promijeniti sjedište.

Odluka o promjeni sjedišta zadruge donosi se na način predviđen ugovorom o osnivanju zadruge ili statutom zadruge.

II - OSNIVANJE ZADRUGE

Član 9.

Zadrugu mogu osnovati najmanje sedam poslovno-sposobnih fizičkih lica.

Član 10.

Zadruga se osniva zaključivanjem ugovora o osnivanju zadruge.

Ugovor se zaključuje u pisanoj formi i sadrži:

- imena osnivača,
- firmu, sjedište i djelatnost zadruge,
- iznos sredstava za osnivanje i početak rada zadruge i način osiguranja sredstava,
- oblik, visinu i broj osnivačkih uloga zadrugara,
- rok u kojem se moraju unijeti osnivački ulozi,
- prava i obaveze osnivača u pogledu obavljanja djelatnosti, upravljanja, učešća u dobiti, nastupanja u pravnom prometu zadruge, odgovornosti i povrata sredstava,
- ime lica koji će sazvati osnivačku skupštinu,
- visinu jemstva zadrugara,
- druge odredbe koje se odnose na osnivanje, poslovanje i prestanak zadruge.

Poslije zaključivanja ugovora o osnivanju zadruge i unošenja osnivačkog uloga saglasno ugovoru o osnivanju, saziva se osnivačka skupština zadruge.

Osnivačka skupština donosi statut zadruge i imenuje direktora zadruge.

Član 11.

Osnivači zadruge ulažu u zadrugu osnivačke uloge, a novi zadrugari uloge.

Osnivački i drugi ulozi mogu biti u novcu, stvarima i pravima izraženim u novčanoj protivvrijednosti.

Način procjene novčane protivvrijednosti uloga utvrđuje se ugovorom o osnivanju zadruge.

Minimalni iznos ukupnog osnivačkog uloga u novcu ne može biti manji od 3.000,00 KM.

III - UPRAVLJANJE ZADRUGOM

Član 12.

Zadrugom upravljaju zadrugari.

U upravljanju zadrugom svaki zadrugar ima jedan glas, ako ugovorom o osnivanju ili statutom nije drukčije određeno.

Član 13.

Organi zadruge su: skupština, nadzorni odbor i direktor.

Statutom zadruge može se predvidjeti formiranje i drugih tijela i utvrditi njihov djelokrug, način izbora i trajanje mandata, prava, obaveze i odgovornosti i druga pitanja važna za rad zadruge.

Član 14.

Skupština zadruge je najviši organ upravljanja u zadruzi.

Skupštinu zadruge čine svi zadrugari, odnosno, od njih ovlašteni predstavnici.

Skupština zadruge:

- donosi statut zadruge,
- odlučuje o planiranju rada i razvoja zadruge, o raspodjeli i upotrebi dobiti i pokriću gubitaka,
- imenuje i razrješava direktora zadruge,
- usvaja godišnji plan poslovanja i završni račun,
- imenuje i razrješava nadzorni odbor zadruge, odnosno, druga tijela zadruge,
- odlučuje o izdavanju vrijednosnih papira,
- odlučuje o statusnim promjenama i drugim pitanjima predviđenim ugovorom o osnivanju zadruge, statutom i zakonom,
- utvrđuje visinu udjela svakog pojedinog zadrugara u ukupnoj imovini zadruge,

- odlučuje o drugim pitanjima predviđenim statutom ili koja nisu u nadležnosti drugih tijela zadruge.

Član 15.

Nadzorni odbor nadzire poslovanje zadruge i obavlja i druge poslove predviđene statutom zadruge.

O nalazima u svome radu nadzorni odbor informiše skupštinu zadruge.

Broj članova nadzornog odbora utvrđuje se statutom zadruge.

Član 16.

Skupština zadruge, u skladu sa statutom zadruge, imenuje i razrješava direktora zadruge.

Za direktora zadruge može biti imenovan i zadrugar koji ispunjava uslove utvrđene zakonom i statutom zadruge.

Direktor ne može biti član nadzornog odbora.

Član 17.

Zadrugari mogu obavljati stručne i druge poslove u zadruzi prema svojim stručnim i radnim sposobnostima, na osnovu statuta zadruge.

Član 18.

Zaposleni u zadruzi ostvaruju svoja prava i obaveze po osnovu rada a na osnovu zakona, kolektivnog ugovora i statuta zadruge.

Zaposleni u zadruzi mogu postati zadrugari ako ispune uslove predviđene statutom zadruge.

IV - IMOVINA I POSLOVANJE ZADRUGE

Član 19.

Imovinu zadruge čine osnivački ulozi zadrugara, ulozi novih zadrugara i sredstva ostvarena radom i poslovanjem zadruge.

Imovina zadruge zajednička je imovina zadrugara srazmjerno njihovim udjelima.

Ugovorom o osnivanju zadruge utvrđuje se rok u kome zadrugar ne može raspolagati svojim udjelom u zadruzi niti pojedinim stvarima i pravima iz zajedničke imovine niti može zahtijevati njenu diobu.

Zadruga u svome poslovanju koristi imovinu zadruge, a može koristiti imovinu i sredstva zadrugara, i drugih fizičkih i pravnih lica, može koristiti zemljište i druga sredstva u svojini Brčko Distrikta Bosne i Hercegovine (u daljem tekstu: Distrikt), ukoliko su zadruzi ustupljeni na korištenje ugovorom i u skladu sa zakonom.

Visinu naknade za upotrebu zemljišta određuje, kao i Ugovor o korištenju zemljišta u vlasništvu Distrikta zaključuje sa zadrugom gradonačelnik Distrikta, na prijedlog Odjeljenja za poljoprivredu i šumarstvo Vlade Distrikta.

Član 20.

Dobit koju zadruga ostvari svojim poslovanjem pripada zadrugarima srazmjerno njihovom ulogu i doprinosu u radu zadruge, na osnovu ugovora o osnivanju zadruge i statuta.

Skupština zadruge može odlučiti da dobit ili dio dobiti upotrijebi za razvoj zadruge.

Posebnim ugovorom zaključenim između zadruge i lica koja su uložila sredstva u zadrugu a nemaju status zadrugara, utvrđuje se pravo na učestvovanje u raspodjeli dobiti.

Član 21.

Zadruga posluje u svoje ime i za svoj račun, u ime i za račun zadrugara, a može poslovati u svoje ime i za račun zadrugara, u skladu s ugovorom o osnivanju i statutom.

Zadruga u pravnom prometu odgovara za svoje obaveze svom svojom imovinom.

Za obaveze zadruge koje se ne mogu izmiriti iz imovine zadruge, zadrugari odgovaraju do visine jemstva utvrđenog ugovorom o osnivanju zadruge.

Statutom zadruge utvrđuje se rok koji ne može biti kraći od godine dana, u kome zadrugar koji je istupio iz zadruge odgovara za obaveze nastale za vrijeme njegovog članstva.

V - PRESTANAK ZADRUGE

Član 22.

Zadruga prestaje:

1. ako skupština zadruge dvotrećinskom većinom svih glasova zadrugara odluči da zadruga prestaje;
2. ako skupština zadruge odluči da se zadruga spoji s drugom zadrugom, da se pripoji drugoj zadruzi ili da se podijeli na više zadruga;
3. ako se pravosnažnom odlukom suda utvrdi ništavost upisa u sudski registar;
4. u slučaju stečaja;
5. u drugim slučajevima utvrđenim zakonom, ugovorom o osnivanju, odnosno statutom zadruge.

Član 23.

Ako se zadruga spoji s drugom zadrugom, pripoji drugoj zadrugi ili se podijeli na više zadruga, imovina i obaveze zadruge prenose se na njene pravne sljedbenike.

Nad zadrugom koja prestaje u drugim slučajevima predviđenim članom 22. ovog zakona, sprovodi se postupak likvidacije.

Član 24.

Prestankom zadruge imovina u zadrugi poslije podmirenja obaveza prema povjeriocima, raspoređuje se zadrugarima u skladu sa ugovorom o osnivanju i statutom zadruge.

VI - KAZNENE ODREDBE

Član 25.

Novčanom kaznom od 1.000 do 4.000 konvertibilnih maraka kaznit će se za prekršaj zadruga:

1. ako obavlja djelatnost koja joj nije upisana u sudski registar (član 2. zakona);
2. ako otpočne djelatnost prije nego što dobije odobrenje o ispunjavanju propisanih uslova (član 3. zakona).

Za radnje iz stava 1. ovoga člana kaznit će se za prekršaj odgovorno lice u zadrugi novčanom kaznom od 200 do 800 konvertibilnih maraka.

Član 26.

Novčanom kaznom od 800 do 2.000 konvertibilnih maraka kaznit će se za prekršaj zadruga:

1. ako u poslovanju ne upotrebljava naziv firme ili skraćeni naziv firme onako kako je upisana u sudski registar (član 6. zakona);

2. ako odluku o promjeni sjedišta ne donese na način predviđen ugovorom o osnivanju zadruge ili statutom zadruge (član 8. zakona).

Za radnje iz stava 1. ovoga člana kaznit će se za prekršaj odgovorno lice u zadruzi novčanom kaznom od 100 do 400 konvertibilnih maraka.

VII - PRIJELAZNE I ZAVRŠNE ODREDBE

Član 27.

Postojeće zemljoradničke zadruge, koje su registrovane ili obavljaju bilo kakvu djelatnost na teritoriji Distrikta, ili čiji naziv uključuje riječ "zemljoradnička zadruga", će u roku od šest mjeseci od stupanja na snagu ovog zakona, uz saglasnost Odjeljenja za poljoprivredu, šumarstvo i vodoprivredu Vlade Brčko Distrikta BiH (u daljem tekstu: Odjeljenje), podnijeti prijavu za upis u sudski registar.

Saglasnost za upis će se izdavati na osnovu zahtjeva podnijetog Odjeljenju u roku od tri mjeseca od dana stupanja na snagu ovog zakona.

Zahtjev će uključiti:

- spisak članova zadruge, uključujući i sve organizacione jedinice,
- spisak članova svih upravnih i nadzornih tijela zadruge,
- spisak imovine, posebno uključujući zemljište, opremu, građevine i ostala sredstva,
- podzakonska akta ili pravilnike kojima se reguliše njihova aktivnost,
- prepise bilansa stanja i uspjeha i uvid u stanje blagajne i za posljednjih pet godina.

Sva pravna lica određena stavom 1. ovog člana koja su koristila imovinu Distrikta, ili pravnih lica čiji je Distrikt sukcesor u skladu sa članom 71. Statuta Brčko Distrikta Bosne i Hercegovine, biće dužna da pored dokumentacije iz prethodnog stava dostave i zapisnike sa svojih godišnjih i ostalih sastanaka u posljednjih pet godina.

Ako je predočena dokumentacija u skladu sa zakonom, Odjeljenje će u roku od 3 mjeseca od prijema zahtjeva izdati saglasnost za upis u sudski registar.

Lica iz stava 1 ovo člana koja ne izvrše registraciju u predviđenom roku biće brisana iz registra.

Član 28.

Danom stupanjem na snagu ovog zakona na teritoriji Brčko Distrikta prestaje primjena Zakona o zemljiрадничким задругама (objavljen u "Službenom glasniku Republike Srpske" broj 18/99) kao i Zakona o задругама Federacije BiH (objavljen u "Službenom glasniku Federacije" broj: 28/97).

Član 29.

Ovaj zakon stupa na snagu osmog dana od dana njegovog objavljivanja u "Službenom glasniku Brčko Distrikta BiH".

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Broj:0-02-022-325/02
Brčko, 13. decembar 2002.godine

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

PREDSJEDNIK
SKUPŠTINE BRČKO DISTRIKTA

Mirsad Đapo, dipl.pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.